

蘇州府志
(乾隆)
一二

蘇州府志卷第六十五

人物十九

吳江縣

明

沈璟字伯英漢曾孫萬歷二年進士授兵部主事歷禮吏二部員外上疏爲王恭妃請封號忤旨降行人司正遷光祿寺丞以疾乞歸二十餘年卒璟在部時留心邊事詢訪人才晚習爲和光忍辱改字聃和精於六書兼通樂府自號詞隱生天啓初追錄國本建言諸臣贈光祿寺少卿

沈瓚字子勺璟弟萬歷十四年進士授南京刑部主事進郎中出爲江西僉事居二年乞歸年僅三十七耳家居十八年以

薦起補廣東僉事甫入境病卒瓚孝友能周人之急立義莊
贍族事兄璟如父庶叔佐坐冤獄悉力營解又撫其孤分產
與之平居未嘗以竿牘入公府有年家子爲家奴所陷坐重
辟瓚知其枉爲白之縣時知縣劉時俊清嚴絕請託素敬瓚
爲立出之且露封荅曰使百姓聞吾過也

以上松陵文獻

袁黃字坤儀萬歷十四年進士授寶坻知縣邑諸役倍於田賦
車運皇木役爲甚黃建議請由會通河運入移皇木廠於三
賢祠北使濱水受木便臺使爲奏報可因盡革重夫重馬採
石箭手諸役潞藩之國鄰邑科斂爲公費水淺舟膠留頓則
費逾廣黃令囊沙壅下流水滿則舟易達及舟將至則啓囊

沙更壅其下不移日越境去邑地窪下苦潦黃浚三岔河築堤捍之海水時溢入爲患令岸上多植柳高數尺潮退沙遇柳輒淤漸成堤因於堤內開溝塍課耕種曠土大闢擢兵部職方主事倭躡朝鮮經略宋應昌疏請黃贊畫軍前訪求奇士得山陰馮仲纓吳人金相置幕下時朝廷方遣辯士沈惟敬入倭營議封貢罷兵倭酋行長許之與提督李如松約以明年正月入平壤受冊退師黃以問仲纓相兩人策如松必借封期以襲平壤襲而克則敗封旣克而驕又必大敗正月如松果襲平壤入之所部兵割麗人首以獻功黃面數如松以襲封殺降之罪如松大恨已而如松大敗於碧蹄館黃乃

告應昌遣仲纓往說倭酋清正約盟解兵事垂成而如松以
十罪列黃黃遂中察典免歸家居十餘年卒年七十四天啓
改元追敘東征功贈尙寶司少卿黃博學尙竒凡河洛象緯
律呂水利河渠輶鈴賦役屯田馬政以及太乙竒門六壬岐
黃勾股堪輿星命之學莫不洞悉原委著書甚富今所存者
兩行齋集歷法新書羣書備考子儼有文名天啓五年進士
授高要知縣未幾卒

松陵文獻
葉志合纂

吳默字因之兄之勇以經學名默獨好靜悟讀書古寺每循几
夜行明發復危坐萬歷二十年會試第一授兵部主事歷禮
部郎中遷尙寶司丞進少卿舊制璽卿班在詞臣前已漸失

其初默毅然建議復之改通政司參議歷左通政擢太僕寺卿以病免崇禎中卒年八十七默立朝最淺遷除皆不赴職然時論高之每會推必首及云初吳江知縣劉時俊以漕卒鼓譟爲淮撫李三才所劾默方官尙寶素聞時俊賢爲訟言於朝吏部尙書孫瑋竟用默議僅奪時俊俸二月而默卒不令時俊知也晚徙家吳門是時縉紳文震孟姚希孟舉人朱陞宣張世偉楊廷樞輩並以文章氣節重鄉里默恒爲之首巡撫以下時造請其門民開利病知無不言然性褊急不能容人之短以疑出其繼妻筆其子至死議者亦以此疵之

松陵

文獻葉
志合纂

沈琦字仲玉漢曾孫少孤卽有成人之度訓二弟琬琰肅如嚴師萬歷二十三年與琬同舉進士後十年珣復繼之時以爲榮琦初授淄川知縣稅監方恣橫守令觸之立碎琦將至先白上官曰彼來琦必不令得志請以身當之又宣言於吏士曰母老身病方借此求歸耳稅監聞之逡巡不入境民有訟者片言立決凡二年間惟一囚坐贖後徙高陵三原入覲還託病卧陰令健卒四出盡縛稅監用事諸參隨寘之法皆駭服不敢動以禮部主事徵人尋卒

松陵
文獻

沈琬字季玉甫釋褐以母老乞歸養母卒服闋補鳳陽教授轉南京國子學正遷南京刑部主事歷郎中出知東昌府爲政

清簡擢山東副使萬歷四十三年山東旱蝗大飢巨盜劉好問等聚衆爲亂僚屬畏禍各託故去琬兼數篆發廩振給禽盜魁斬之招集流移置常平倉立義冢明年麥大熟乃乞致仕歸琬好禪理少時欲爲僧兄琦禁之乃止每之官必與櫬自隨布袍蔬食卽俸金亦貯庫不入署舍家旣貧官刑部時值吳中大祲諸子皆緣岸采蕪菁煮食自給晚年屏居吳山從牖隙中度飲食家中子弟罕見其面人謂其廉介不減吳隱之云琬字幼玉初授中書選御史累官副都御史巡撫山東議增兵設防及戢劉興治亂軍具有方略時以琬與兄琦琬稱沈氏三鳳琬子自繼自微自炳自然自馴自南皆有名

自繼字君善工詩文性耿介隱居終身自徵字君庸好兵家
言慕魯仲連爲人居京師爲樞臣說督師袁崇煥入朝久之
歸出橐中金市田給昆弟宗族性穎悟絕人爲文立就不錄
稿多散自炳以下分見後琉從子士哲字若宇萬歷乙卯舉人官南
康知縣以孝友稱松陵文獻參葉志

張尙友字益之基之子爲諸生精春秋之學吳中治春秋者皆
宗之事父純孝父病革刲股和糜以進人有欲上其事者尙
友怒曰是欲我以死父取名乎狀苟上我必死之尤以氣節
自勵常熟趙用賢以諫張居正奪情廷杖尙友重其人及用
賢再召送以序頌而能規卒年五十八有遺文八卷

錢謙益表參姚

希孟
狀

俞安期字羨長吳江人徙陽羨老於金陵巨目曷鼻魁顏長身
狀貌如河北儻父與之談盱衡抵掌意氣勃如也少客於龍
君揚受國士之遇君揚被譴入楚慰之遣戍永安又入豫章
送之與楚人丁元甫爲意氣之交元甫歿厚遇其子海內歸
義焉嘗爲長律百五十韻投王世貞世貞爲之傾倒先是邑
中王叔承以布衣游公卿間名籍甚安期後起名遂相亞叔
承雖好山水然守母遺訓未嘗遠游安期一出十年周覽五
嶽所至觴酌流行絲肉並奏酒酣坐嘯聽者皆歎其有鸞龍
之音又多技能好相人宅冢沾沾自喜有蓼蓼集數十卷子

南史字無殊亦工詩和雅冲澹類其爲人

列朝詩集參
松陵文獻

周道登字文岸吳江人萬歷二十六年進士由庶吉士歷遷少

詹事天啓時爲禮部左侍郎頗有所爭執以病歸五年秋廷

推禮部尙書魏忠賢削其籍崇禎初與李標等同入閣道登

無學術奏對鄙淺傳以爲笑御史田時震劉士禎王道直吳

之仁任贊化給事中間可陞交劾之悉下廷議吏部尙書王

永光等言道登黨護樞臣王在晉及宗生朱統錦鄉人陳于

鼎館選事俱有實跡乃罷歸閱五年而卒

明史 按明史於
道登貶斥如此而

松陵文獻言其事兄如父門庭肅穆篤於親故居官廉慎自
將以不善附和爲黨人所嫉惟思怨太明論者或少其量其
志亦言道登自掌禮曹至入相朝廷屢有恩蔭皆堅辭謝
濫杜請謁故忌疾者衆蓋道登固無才略猶不失爲賢

是時黨局紛爭人言亦未可盡信也

趙士諤字蹇卿寬從曾孫萬歷二十九年進士授會稽知縣政務清約奸民妄言富順永昌有礦金稅監將行開采士諤以宋諸陵所在力持不可浚淤浦數十里溉田萬餘畝民以趙公浦名之入爲職方主事調吏部考功司改文選累進郎中四十五年主京察時吏科都給事中徐紹吉掌河南道御史韓浚欲斥行人劉宗周士諤獨言昔令會稽時嘗至宗周家親見其清操絕人不當掛吏議由是宗周得免黜遷太僕少卿明年擢僉都御史巡撫宣府額兵八萬素多虛冒而是時急徵兵援遼宣府獨倍他鎮士諤三上章力持之未報會總

兵劉孔穎憚行兵大譁士諤乃宣所上章諭以朝廷威德斬

其渠以徇尋引疾歸

松陵文獻
參新志

莊元臣字忠甫萬歷三十二年進士授中書舍人尋卒元臣學

無所不窺喜談經濟每閱一書必劈肌解族扼要鈞元其爲

古文辭經營極苦會意所至千言立就因爲文論以明古今

作者之得失所著有叔苴子覺參符三才考略金石謬鳳閣

草時務策凡數百卷兄憲臣字昆明亦博雅士也

松陵
文獻

孫養正字聖功萬歷三十二年進士授興化府推官精聽斷訊

獄得情嘗設善惡二籍朔望令保甲條報民間事備書其上

亡得謾語異時有告言者取籍視之具知其人本末攝蕭田

事詔蠲是年賦額十之一吏具牒概徵叱曰壅天子德意令百姓困誅求爾輩罪足贖耶竟如詔書亡何卒官人咸惜之

松陵文獻

云見閩書

沈正宗字因仲萬歷丁未進士授工部主事轉員外郎時無錫顧憲成倡東林書院與士大夫講學御史徐兆魁具疏力攻之光祿丞吳炯疏辨不報正宗上言兆魁巧誣憲成已經吳炯據實疏明臣所嗟憤不平者惟是國釀空虛之禍人進禁錮之謀天下方痛衆君子之易退兆魁則惟恐一君子之或進漢唐宋末季之禍奈何復蹈其轍乎願皇上察治亂之幾審賢奸之路立名憲成等赴闕速論兆魁等剖疑釋猜執政

疾之辛亥京察以浮躁降調丁內外艱補浙江布政司理問
未赴轉兵部主事天啓中忤璫削籍崇禎初起故官歷河南
參議流賊混十萬曹操整齊王分道寇河南正宗率所部六
千人擊敗之疏言流賊宜勦不宜撫條上方略甚悉尋致仕

歸葉
志

周宗建字季侯尙書用曾孫萬歷四十一年進士除武康知縣
調繁仁和有異政入爲御史天啓元年遼事方棘上疏責備
輔臣無何瀋陽破宗建責當事大臣益急因請破格用人召
還熊廷弼是歲冬奉聖夫人客氏旣出官復入宗建首抗疏
極諫忤旨詰責明年廣寧失廷臣多庇王化貞欲甚熊廷弼

罪宗建不平爲剖兩人罪案頗右廷弼諸庇化貞者乃深疾
宗建京師久旱五月雨雹宗建謂陰盛陽衰之徵歷陳四事
一專譏大學士沈淮一請寬建言廢黜諸臣一言廷弼已有
定案不當因此羅織朝士陰刺兵部尚書張鶴鳴給事中郭
鞏一則專攻魏進忠略言近日政事外廷嘖嘖咸謂與竇之
中莫可測識諭旨之下有物憑焉如魏進忠者口不識一丁
而陛下假之噱笑日與相親一切用人行政墮於其說東西
易向而不知邪正顛倒而不覺況內廷之借端與外廷之投
合互相扶同離間之漸將起於蠅營讒構之釁必生於長舌
其爲隱禍可勝言哉進忠者魏忠賢故名也時方結客氏爲